

## Josefina Caderas-Hendry



Mia cara tatta Fina ei naschida ils 22 da matg 1924 sco 10avel affon da Barla Catrina e Giachen Martin Hendry-Peder a Cavorgia, nua ch'ella ei carschida si cun quater soras e tschun frars. Leu ha ella passentau sia biala affonza el ravugl da sia famiglia.

Cun 16 onns ei ella serendida a Turitg e silsunter ella Svizra Franzosa, nua ch'ella ha menau in tenercasa en ina famiglia. Suenter entgin temps eis ella puspei returnada en sia biala Val Tujetsch.

En quei temps ha ella empriu d'enconuscher miu car tat Toni da Ladir, che luvrava el Hotel Oberalp sco portier. Suenter cuorta amicezia, igl onn 1950, ein els maridai. Niessegner ha schenghegiau a lur lètq 4 affons, dus buobs e duas buobas. Ella ei stada ina cara e buna mumma e tatta, ha adina giu grond quitau per ils ses. In da ses hobis era segir il cuschinar.

Suenter otg bials onns a Ladir, ein els serendi a Sedrun, nua ch'els han igl onn 1966 baghegiau lur agen da casa.

Cu il tat ei vegnius pensiunaus 1989, han els priu la peda per lur carezau Tessin. Els han gudiu la veta ed aunc passentau bia bials onns ensemen, seigi quei cun ir per izuns ni era encurir bulius.

2008 ei il tat vegnius malsaus ed els ein stai sfurzai da prender cumiau dalla casa paterna. La decisiun da stuer serender ella Tgèsa s.Vigeli ei stada greva per omisdus. Ils 13 da zercladur 2008 havein nus stuiu prender cumiau da nies car tat. Per la tatta eis ei stau fetg grev.

Tuttina ha ella saviu guder treis bials e ruasseivels onns en la Tgèsa s. Vigeli.

Las davosas regurdientschas da mia cara tatta ein: Adina ina fotografia dil tat sper siu letg ed ina scadiala sugus per il personal dalla Tgèsa s. Vigeli ed insumma per tut las visetas.

Cara tatta, Ti has schau anavos bia bialas regurdientschas per mei, special quellas che jeu hai astgau passentar ensemen cun vus el Tessin. El num da Tia entira famiglia lessel engraziar a Ti per tut il bien, Tia carezia e per tut ils bials muments ensemen cun Tei.

Ils 15 da fenadur ha la mort spluntau anetgamein tier Tei. Mia consolaziun ei, era sche jeu lasch encrescher per Tei, che Ti has buca stuiu pitir. Ussa eis Ti unida cun Tiu carezau um Toni.

Cara tatta, ruaussa en pasch.

*Tia beadia Miriam*